

पावलसे फिलिप्पीला विश्वासीगदेदा भ्रिबा चिठी चु चिठीला बारेरी पाङ्तोःमा

भ्रिबा म्हिः येशूला मुल चेला पावलसे भ्रिबा मुबा। चु चिठी भ्रिबाला लागिरी पावलदा तिमोथी भिबा म्हिसे हो लबा मुबा (फिलिप्पी १:१)।

भ्रिबा ग्लाः रोम शहरला झ्याल्खानग्याम भ्रिबा मुबा।

भ्रिबा सालः ओस्पन ईश्वी संवत् ६१-६३ (विक्रम संवत् ११८-१२०) सालला गुडरी भ्रिबा मुबा।

खाल्दा भ्रिबाः फिलिप्पी शहररी मुबा विश्वासीगदेदा भ्रिबा मुबा। (मुल चेला १६:११-४०)

फिलिप्पी शहर चा माकेडोनिया अञ्चलला रोम यहुल्साला मुल शहर मुबा। चु शहर दान्दे यूरोपरी परब तमुला। चु चिठी भ्रिबा धुडरी पावल झ्याल्खानरी मुबा। थे धुडरी फिलिप्पी शहररी मुबा मण्डलीरी लुसीला ताम लोप्बासे लमा पावलदा दुख इहम्बा मुबा। तर पावलला कोड्बा विश्वाससे लमा चु चिठीसे फिलिप्पीला विश्वासीगदेसे विश्वासरी आँट याड्जी।

चु चिठी चा फिलिप्पीला विश्वासीगदेदा धन्यवाद पिन्बाला लागिरी भ्रिबा मुबा। थेनीगदेसे पावलदा खाँचो तबा धुडरी भेटी पुइसी हो लबा मुबा। ओच्छे थेनीगदेदाएनोन दुख तबा धुडरी पावलसे हाडदेन थेनीगदेदा विश्वासरी कोड्ना लबारीदेन आँट पिन्बाला लागिरी चु चिठी भ्रिबा मुबा। हाड जे चबा थुड्बा लम्याड्सम तला भिसी म्हन्बा भन्दा सोजो तसी येशूला हड्बान बानीबेहोर थोगै भिसी पाड्बा मुला। स्त्रीष्टदेन छ्याम गिक तबा

थेनीगदेला बानीबेहोर चा परमेश्वरग्याम याड्बा मोलम हिन्ना। चु मोलम चा थेनीगदेसे यहूदीगदेला ठिम अन्छार भ्रबासे लमा याड्बा आहिन, तर थेनीगदेसे लबा विश्वासग्याम याड्बा हिन्ना भिसी पावलसे थेनीगदेदा ढन्ना लबा मुला। ओच्छे ख्रीष्टदा विश्वास लबागदेसे याड्बा ताड्बा तामदेन शान्तिला बारेरी पावलसे भ्रिबा मुला।

चु चिठीरी ख्रीष्टदा विश्वास लबागदेसे याड्बा ताड्बा ताम, आँट, गिक तबादेन सेमहेन्सेन गे लबा तामगदेला बारेरी पाड्बा मुला। ओच्छे चु चिठीरी पावलसे फिलिप्पीला विश्वासीगदेदा गाते माया लमुला भिबा ताम उन्बा मुला।

मुल तामगदे

फ्याफुल्बादेन प्रार्थना १:१-११

पावलदा तबा तामगदे १:१२-२६

ख्रीष्टदेन छ्याम मुबा जुनी १:२७-१:१८

तिमोथीदेन इपाफ्रोडिटस २:१९-३०

होशियार तना लबा तामगदे ३:१-४:९

भेटीला लागिरी धन्यवाद पिन्बा ४:१०-२०

चिठीला थुमरी भ्रिबा ताम ४:२१-२३

पावलसे फिलिप्पीला विश्वासीगदेदा भ्रिबा चिठी

पावलसे फिलिप्पीला विश्वासीगदेदा फ्याफुल्बा

¹ लासूसो, ख्रीष्ट येशूदा तेन्बा डा पावलदेन तिमोथीग्याम फिलिप्पीरी मुबा ख्रीष्ट येशूदा विश्वास लबा परमेश्वरला म्हिगदेदेन मण्डलीदा च्याबा म्हि ओच्छे मण्डलीरी हो लबागदेदा फ्याफुल्ला!*

* 1:1 मुल १६:१२

2 यहाडला परमेश्वर आबादेन प्रभु येशू ख्रीष्टग्याम एनीगदेदा दयामायादेन शान्ति तगै।

पावलसे लबा प्रार्थना

3 एनीगदेदा ढन्मा डाइ डाला परमेश्वरदा सदन धन्यवाद पिन्बा मुला। 4 डाइ प्रार्थना लबा धुइरी सदन एनीगदेला लागिरी ताड्सी ताड्सी प्रार्थना लमुला। 5 तिग्दा भिसम थार्बा पिन्बा समाचार थेःना लबाला लागिरी डाच्छाहेन्से दान्देधोना एनीगदेसे सेम गिक लसी डादा हो लबा मुला। 6 परमेश्वरसे एनीगदेला गुडरी शुरु लबा ज्यबा गे येशू ख्रीष्ट फेपूखबा धुइधोनारी थेसेन पूरा लला भिबा ताम डादा पूरा विश्वास मुला।

7 डाइ एनीगदेला बारेरी चुहड्बा ताम म्हन्बाएनोन ठीक हिन्ना। एनीगदे सदन डाला सेमरी मुला। तिग्दा भिसम डा झ्याल्खानरी मुबा धुइरीनोन ओच्छे थार्बा पिन्बा समाचार जोगब लबारीदेन स्य्हान्दो म्हिगदेदा थेःना लबा चु गे न्हीरीन परमेश्वरला दयामायारी एनीगदेसे सेम गिक लसी डादा हो लबा मुला। 8 डाइ ख्रीष्ट येशूला मायाग्यामसे एनीगदे जम्मादान गाते ढन्बा मुला भिबा ताम परमेश्वरदान था मुला।

9 परमेश्वरग्याम ज्ञान बुद्धि याड्सी एनीगदेला माया झन झन लहेबान निगै भिसी डाइ प्रार्थना लबा मुला। 10 चुहड् लजी भिसम एनीगदेसे जम्मान भन्दा ज्यबा ताम तिग हिन्ना, थे फेबारी खम्ला। ओच्छे ख्रीष्ट फेपूखबा धुइला लागिरी एनीगदे तिगै दोष आरेबा चोखो म्हि दोला। 11 परमेश्वरदा मानदेन जयजयकार लबाला लागिरी येशू ख्रीष्टसे पिन्बा परमेश्वरदा सेम निबा बानीबेहोरसे एनीगदेला सेम प्लिड्गै।

पावल झ्याल्खानरी परब तबासे लमा थार्बा पिन्बा समाचार ल्हानान ग्लारी थेःबा

12 ज्योज्यो आले नाना आडागदे, डाइ नाबा चु दुखग्याम थाबा पिनबा समाचार थे:ना लबा गे झन ल्हानान तबा मुला भिबा ताम एनीगदेसे था याङ्गै भिसी डाइ म्हन्बा मुला। 13 ख्रीष्टला बारेरी थे:ना लबासे लमान डा झ्याल्खानरी परब तबा हिन्ना भिसी ग्लेखाडला जम्मान सिपाहीगदेदेन अर्गु जम्मान म्हिगदेसे था याङ्गी जिनबा मुला।* 14 डा झ्याल्खानरी परब तबासे लमा ल्हानान विश्वासीगदे प्रभुरी कोड्बा मुला। ओच्छे थेनीगदेसे आलोङ्गान परमेश्वरला बचन थे:ना लबारी आँट याङ्बा मुला।

15 हिन्बाम कोइ कोइसे चा डाह लसी स्य्हान्दोसे भन्दा डाइ ज्यबा गे लबा मुला भिसी उन्बारी म्हाइमुला, तर स्य्हान्दोगदेसे चा ज्यबा सेमसे ख्रीष्टला बारेरी थे:ना लबा मुला। 16 थाबा पिनबा समाचार थे:ना लबाला लागिरीन परमेश्वरसे डादा धम्बा हिन्ना भिसी था याङ्बागदेसे चा माया लसी सेमहेन्सेन चु गे लबा मुला। 17 डाह लबागदेसे चा ज्यबा सेमसे आहिन। तर झ्याल्खानरी डाइ अझ ल्हानान दुख याङ्गै भिसी हाडसे हाडदान घेन सहोबा सेमसे ख्रीष्टला बारेरी पाङ्बा हिन्ना। 18 ज्यबा सेमसे लसै आज्यबा सेमसे लसै ठीकनोन मुला, जस्तो लसीन ख्रीष्टला बारेरी पाङ्गी भ्रतो:बा हिन्ना।

चु तामरी डा ल्हानान ताङ्बा मुला। 19 हिन्ना डा ताङ्गला। तिग्दा भिसम एनीगदेसे लबा प्रार्थनादेन येशू ख्रीष्टला आत्मासेन हो लसी चु दुखग्याम फेला भिबा ताम डादा था मुला।* 20 डाइ सेमहेन्सेन घेन आश लसी चिबा मुला, डाइ लतो:बा जम्मान गेरी डा खाइमै पे:आतो:। तर डादेन छ्याम ल्हानान आँट मुला। ओच्छे डा सिसै सोसै सदाला हङ् लसीन डाला चु ज्यानसे ख्रीष्टलान मान लला। 21 तिग्दा भिसम डा सोबा चा ख्रीष्टदा तेन्बाला लागिरी हिन्ना। ओच्छे सिबा

* 1:13 मुल २८:३० * 1:19 यूह १४:१६-२१; १६:१२-१५

चा डाला लागिरी झन ज्यबा ताम हिन्ना। ²² डाला चु ल्हुइ सोतेधोना डाइ अझ ज्यबा गे लला। तर डा सिबा कि सोबा चु न्ही न्हडरी खजिबा चा धम्तोःबा थे ताम डादा था आरे। ²³ डादा दोधार तबा मुला। चु जम्बुलिड ख्लासी ख्रीष्टदेन छ्याम चिबा सेमएनोन ल्हानान मुला। तिग्दा भिसम डाला लागिरी चु ल्हानान ज्यबा ताम हिन्ना। ²⁴ तर एनीगदेला लागिरी चा डा सोसीन चितोःबा मुला। ²⁵ थेतबासेलमा एनीगदेदा विश्वासरी ल्हेना लबारीदेन ताड्ना लबारी डा अझ सोसी एनीगदे जम्मानदेन छ्याम चिला भिबा डादा पक्का था मुला। ²⁶ दाहेन्से डा दोःसी एनीगदेदेन छ्याम हुप तमा डाग्याम ख्रीष्टसे लबा गे म्राड्सी एनीगदे अझ ख्रीष्ट येशूदेन छ्याम गिक तसी ल्हानान ताड्म्याड्ला।

²⁷ मुल ताम चा चुनोन हिन्ना, जे तसैनोन एनीगदेला बानीबेहोर ख्रीष्टला थार्बा पिन्बा समाचार अन्छार ततोःला। थेतबासेलमा डा एनीगदेदेन छ्याम हुप तसै आतसै थार्बा पिन्बा समाचाररी स्य्हान्दो म्हिगदेसे विश्वास लगै भिसी एनीगदे सेम गिक तसी ढिक्सी दुख लबान गे लबा मुला भिबा ताम डाइ थेःम्याड्गै। ²⁸ ओच्छे बिरोध लबा म्हिगदे म्राड्सी एनीगदे थालोड्गो। चु थेनीगदेला लागिरी चा नाश तबाला चिनु हिन्ना। तर एनीगदेला लागिरी चा थार्बा याड्ला भिसी म्राड्बा चिनु हिन्ना। थार्बा याड्बा चा परमेश्वरग्यामनोन हिन्ना। ²⁹ एनीगदेदा पिन्बा मौका ख्रीष्टदा विश्वास लबा जे आहिन, तर ख्रीष्टला लागिरी दुख नाबारीनोन हिन्ना। ³⁰ डाइ डाच्छा नाबा दुख एनीगदेसे म्राड्बा मुबा, थे दुख डाइ दान्देनोन नाबान मुला भिसी एनीगदेसे थेःबा मुला। चुनोन दुख एनीगदेसेनोन नाबान मुला।*

* 1:30 मुल १६:१६-४०; १ थेस २:२

2

1 तिग ख्रीष्टदेन छ्याम गिक तबासे लमा एनीगदेसे आँट याड्बा मुला? ओच्छे तिग थेला मायासे एनीगदेसे हो याड्बा मुला? तिग परमेश्वरला आत्मादेन छ्याम संगती लबा मुला? तिग एनीगदेसे हाड हाड न्हडरी सेमहेन्सेन दया लबा मुला? 2 थेहड् भिसम एनीगदे जम्मान सेम गिक तसी हाड हाड न्हडरी माया लउ, ओच्छे ठिक्सी छ्याम छ्यामनोन गे लसी डादा ताड्ना लउ। 3 ओच्छे हाडला जे ग्याम च्यासी गे लबादेन हाड जे घेन भिसी थाम्हन्गो। तर हाड भन्दा स्यूहान्दोदा घेन म्हनसी सोजो तसी चिउ। 4 एनीगदे जम्मासेन हाडदा जे ज्यबा तगै भिसी थाम्हन्गो। तर स्यूहान्दोदाएनोन ज्यबा तगै भिसी म्हनगो।

5 एनीगदेसे ख्रीष्ट येसूला हड्बान सेम थोगो।

6 येसू ख्रीष्ट डाच्छाहेन्सेन परमेश्वर मुबा।

तसैनोन थे परमेश्वर दोबारी आम्हाइनी।

7 बरु स्वर्गरी मुबा हाडला जम्मान सहे ख्लासी

म्हि दोसी जम्बुलिडरी केजी।

ओच्छे नोकर हड्बान दोजी।

8 थे हाडनोन म्हि दोसी फेपूखसैनोन सोजो तसी

परमेश्वरसे कुल्बा ताम ड्यान्सी

क्रुसरी सिबारीनोन तयार तजी।

9 थेतबासेलमा परमेश्वरसे थेदा जम्मान भन्दा घेन स्होसी

जम्मान सहेगदेला भन्दा घेन मिन थान्जी।

10 थेतबासेलमा स्वर्गदेन जम्बुलिड ओच्छे जम्बुलिड धिरी मुबा

जम्मासेन येसूदा मान लबारी पुइ जूतो:ला।

11 थेहड् लसीन परमेश्वर आबाला मानदेन जयजयकार लबाला

लागिरी

जम्मासेन येसू ख्रीष्टनोन प्रभु हिन्ना भिसी पाड्तो:ला।*

* 2:11 यशै ४५:२३

नाडसलसे हड् लसी य्हाल तना लउ

12 डाला सेम निबा ह्योगदे, डा एनीगदेदेन छ्याम मुबा धुइरी एनीगदेसे डाइ पाड्बा ताम ड्यानमुबा। दान्दे डा एनीगदेदेन छ्याम आरेमा झन डाइ पाड्बा ताम ड्यानबा चा घेन ताम हिन्ना। परमेश्वर म्राड्सी लोड्गो ओच्छे थेदा मान लसी एनीगदेसे याड्बा थार्बा अनछारला गे लउ। 13 तिग्दा भिसम परमेश्वरसे एनीगदेदा थेसे कुल्बा ताम ड्यानबा सेमदेन थेदा ताड्ना लबा शक्ति पिन्सी एनीगदेला गुडरी गे लबान मुला।

14 थेतबासेलमा गनगनदेन कल आलना जम्मान गे ढिकसी लउ। 15 थेहड् लजी भिसम एनीगदे पापीदेन न्होड्बा म्हिगदेला गुडरी चोखोदेन तिगै दोष आरेबा म्हि तसी परमेश्वरला सन्तान दोला। ओच्छे सारसे मुरी य्हाल तना लबा हड् लसी एनीगदेसे जम्बुलिडरी य्हाल य्हाल तना लला।* 16 एनीगदेसे थेनीगदेदा थार्बा पिन्बा ख्रीष्टला समाचार थेःना लजी भिसम ख्रीष्ट फेप्लबा धुइरी डाइ दुख लसी लबा गे खेरोरी आनिनी भिसी डा ल्हानान ताड्म्याड्ला। 17 ओच्छे एनीगदेला विश्वासग्याम एनीगदेला लहुइ परमेश्वरदा फुल्बा बलि हड्बान दोबा मुला। डाला लहुइएनोन एनीगदेला लहुइदेन छ्याम बलि हड् लसी फुल्तोःसैनोन डा ताड्ला। ओच्छे एनीगदे जम्मानदेन छ्याम डा सेमहेन्सेन ताड्ला। 18 थेहड् लसीन एनीगदे ताड्गो, ओच्छे डादाएनोन ताड्ना लउ।

तिमोथीदेन इपाफ्रोडिटस

19 डाइ तिमोथीदा एनीगदे मुबा ग्लारी योनान पुइखला भिसी प्रभु येशूथोरी आश लबा मुला। चुहड् लसी थेग्याम एनीगदेला बारेरी था याड्सी डा ताड्म्याड्ला। 20 तिमोथीसे हड् लसी एनीगदेदा सेमहेन्सेन वास्ता लबा म्हि डादेन छ्याम स्य्हान्दो

* 2:15 वयव ३२:५

खालै आरे। ²¹ तिग्दा भिसम स्यूहान्दोगदेसे चा येशू ख्रीष्टला तामदा तिगै वास्ता आलना हाडला जे ग्याम च्यासी भ्रमुला। ²² तर तिमोथी खाहड्बा म्हि हिन्ना भिबा ताम एनीगदेदा थानोन मुला। तिग्दा भिसम झासे आबादा खाहड् लसी हो लमुला थेहड् लसीन थेसे डादा थार्बा पिन्बा समाचार थेःना लबारी हो लबा मुला। ²³ थेतबासेलमा डादा तिग तबा चीम, थे ताम था याड्मैछ्याम डाइ थेदा एनीगदे मुबा ग्लारी पुइखबा सेम मुला। ²⁴ ओच्छे डाएनोन योनान खम्याड्ला भिसी प्रभुथोरीन भर लबा मुला।

²⁵ एनीगदेसे डादा हो लबाला लागिरी पुइखबा प्रभुरी डाला आले, डादेन छ्याम ठिक्सी प्रभुला गे लबा ओच्छे डादा हो लबा ख्रीष्टला सिपाही इपाफ्रोडिटसदा एनीगदे मुबा ग्लारी पुइखनोन तोःला भिसी डाइ म्हन्बा मुला। ²⁶ तिग्दा भिसम थेसेनोन एनीगदे जम्मानदेन छ्याम हूप तबारी ल्हानान सेम लबा मुला। थे आखम्बा मुला भिबा ताम एनीगदेसे थेःबासे लमा थेदा ल्हानान सुर्दा तबा मुला। ²⁷ हिन्ना, थे ल्हानान आखम्ना सिबारीन छ्याइमुबा तर परमेश्वरसे थेदा दया लजी। थेदा जे आहिन, डादाएनोन दुखथोरी झन दुख थातगै भिसी परमेश्वरसे दया लजी। ²⁸ थेतबासेलमा थेदा एनीगदे मुबा ग्लारी पुइखबारी डाइ ल्हानान सेम लबा मुला। तिग्दा भिसम थेदा दोःसी म्राड्माहेन्से एनीगदे ताड्ला ओच्छे डाला सुर्दाएनोन म्हाला। ²⁹ एनीगदेसे थेदा प्रभुरी आले हड्बान म्हन्सी सेमहेन्सेन ताड्सी माया लउ। चुहड्बा म्हिगदेदा चा मान लनोन तोःला। ³⁰ तिग्दा भिसम एनीगदेसे डादा लतोःबा हो लबाला लागिरी हाडला जयान्ना तिगै वास्ता आलना ख्रीष्टला गे लबाला लागिरी थे सिबारीन तयार तजी।

3

ल्हुइरी भर थालउ

1 दाहेन्से ज्योज्यो आले नाना आडागदे, प्रभुदेन गिक तबासे लमा एनीगदे ताड्गो। एनीगदेला लागिरी ताम गिकनोन घरिघरि भ्रितोःसै डा छेर्बा आरे। तिग्दा भिसम चु एनीगदेलान विश्वास जोगब लबाला लागिरी हिन्ना।

2 नइबा गे लबा नगी† हड्बा म्हिगदे म्हाड्सी होशियार तसी चिउ। थेनीगदेसे खतना लतोःला भिसी पाड्सी भ्रमुला। 3 य्हाड्से मी परमेश्वरदा आत्माग्याम तेन्बा मुला। ओच्छे ख्रीष्ट येशूदेन छ्याम गिक तसी ताड्बा मुला। य्हाड्से लबा पक्का खतना चा चुनोन हिन्ना। थेतबासेलमा य्हाड् म्हिगदेला गेथोरी भर लबा म्हि आहिन। 4 थेहड्बा म्हिगदेला गेथोरी भर लबा म्हि हिन्सम स्यहान्दोसे भन्दा डाइ ल्हानान भर लखम्सेला मुबा। 5 तिग्दा भिसम डा इस्राएल य्हुलला बेन्यामीन वंशरी न्हबा म्हि हिन्ना। न्हसी भ्रेःरे तमाकुनु डाला खतना तबा हिन्ना। डा हिब्रूगदेलाएनोन हिब्रू हिन्ना, ओच्छे परमेश्वरसे मोशादा पिन्बा ठिम ड्यान्बा फरिसीएनोन हिन्ना।* 6 यहूदी धर्मलान ताम लबा हिन्सम डाइ हाडला धर्मदा जोगब लबारी मण्डलीदा गाते ल्हानान दुख पिन्जी। ओच्छे ठिम अन्छार भ्रसी परमेश्वरदा सेम निबा म्हि दोबा हिन्सम डा तिगै दोष आरेबा म्हि हिन्ना।*

7 तर थे धुइरी डाइ लबा जम्मान गेगदेदेन म्हन्बा तामगदे डाला लागिरी ज्यबान हिन्ना भिसी म्हन्बा मुबा। दान्दे थे जम्मान गेदेन म्हन्बा तामगदे ख्रीष्टला लागिरी तिगै गे आखेल्बा चीम भिसी डाइ था याड्जी। 8 चुदे जे आहिन, डाइ ख्रीष्ट येशूदा डाला प्रभु भिसी डोसेबा ज्ञान बुद्धिला डाच्छा मी थे जम्मान सहे तिगै गे आखेल्बा चीम भिसी डाइ म्हन्बा मुला। ख्रीष्ट येशूदा अझ

† 3:2 यहूदीगदेसे अर्गु य्हुलला म्हिदा “नगी” भिसी पाड्मुबा तर पावलसे चुरी यहूदीगदेदा “नगी” भिसी पाड्बा हिन्ना। तिग्दा भिसम थेनीगदेला गे आज्यबा मुबा।

* 3:5 मुल २३:६; २६:५; रोमी ११:१ * 3:6 मुल ८:३; २२:४; २६:९-११

ज्यना लसी डोसेखमगै भिसी डाइ थे जम्मान सहेदा नइबा गे आखेलबा सहे म्हन्सी ख्रीष्टला लागिरी ख्लासी जिन्बा मुला।
 9 डा ख्रीष्टदेन छ्याम गिक तगै भिसी डाइ म्हन्बा मुला। ओच्छे डा परमेश्वरदा सेम निबा म्हि दोबा चा डाइ ठिम ड्यानसी डा हाडनोन परमेश्वरदा सेम निबा म्हि दोबा आहिन। तर ख्रीष्टदा विश्वास लबासे लमा परमेश्वरदा सेम निबा म्हि दोबा हिन्ना। डाला विश्वासदा च्यासी परमेश्वरसे डादा हाडदा सेम निबा म्हि सहोबा हिन्ना। 10 डाइ ख्रीष्टदा पूरान डोसेसी थेदा सिबाग्याम सोना लबा शक्तिदा था याङ्खमगै, ओच्छे थे सिबा धुइरी थेसे नाबा हड्बान दुख डाइ नाबारी खमगै। 11 थेहड् लसीन तजी भिसम सिबाग्याम दोःसी सोखमगै भिसी डाइ म्हन्बा मुला।

याङ्तोःबा सहे याङ्बारी भड लउ

12 डाइ जम्मान ताम याङ्सी पूरान पाको म्हि दोबा मुला भिसी पाङ्बारी छ्याइबा आहिन। तर चु जम्मान ताम याङ्बाला लागिरी डाइ अझ भड लबान मुला। तिग्दा भिसम ख्रीष्ट येशूसे चुलान लागिरी डादा डाच्छान धम्बा मुला। 13 ज्योज्यो आले नाना आडागदे, चु जम्मान तामगदे याङ्सी जिन्जी भिसी डाइ म्हन्बा आरे। तर गे गिक चा डाइ लबा मुला। थे गे चा तिग हिन्ना भिसम डाच्छाला तामगदेदा म्लेःसी लिच्छाला तामगदेदा जे च्यासी डा भ्रबान मुला। 14 परमेश्वरसे ख्रीष्ट येशूग्याम जुकजुकधोनाला जुनी पिन्बारी डादा ड्योइबा हिन्ना। स्वर्गला चु इनाम याङ्बाला लागिरी डाइ भड लबान मुला।

15 यहाड आत्मारी पाको तबागदे जम्मासेन चुहड्बान सेम थोतोःला। एनीगदेसे कोइ कोइ तामला बारेरी चा अर्गु सेम थोबा मुसम परमेश्वरसे एनीगदेदा घोना लला। 16 ओच्छे यहाडसे जुन ताम याङ्बा मुला, थे तामरीन भ्रइ।

17 ज्योज्यो आले नाना आडागदे, एनीगदेसेनोन डाइ लबा हड्‌नोन लउ। ओच्छे डन्से लबा हड्‌बान गे लसी भ्रबा म्हिगदेदा च्यासी थेनीगदेसे लबा हड्‌बान गे लउ।* 18 ख्रीष्टसे कुसरी सिसी तिग लजी भिसी भ्रबा म्हिगदेला बारेरी डाइ एनीगदेदा ल्हानान रेम पाड्‌सी जिन्बा मुला। दान्‌देनोन डाइ डाला मी नाड मीख्ली थोसी एनीगदेदा पाड्‌बा मुला। 19 थेनीगदे नाश तसी म्हासी निला। तिग्दा भिसम थेनीगदेला ल्हुइसे तिग म्हाइबा थेदान ल भिसी तेन्मुला। ओच्छे पेःबा खबा तामरीनोन थेनीगदे ताड्‌बा चीम। थेनीगदेला सेमएनोन चुनोन जम्बुलिडला तामगदेरी जे मुला। 20 तर य्हाड मी स्वर्गला म्हि हिन्ना। थार्बा पिन्बा य्हाडला प्रभु येशू ख्रीष्ट स्वर्गग्याम फेपखला भिसी य्हाडसे ग्याम च्यासी चिबा मुला। 21 ख्रीष्ट येशूसे जम्मान सूहेदा हाडला तहरी भबा शक्तिग्याम य्हाडला कमजोर ल्हुइदा थेला हड्‌बान य्हाल य्हाल्बादेन शक्तिशाली ल्हुइ स्होला।

4

1 थेतबासेलमा डाला ज्योज्यो आले नाना आडागदे, एनीगदेदा डाइ माया लसी ल्हानान ढन्बा मुला। एनीगदेसे लमान डा ल्हानान ताड्‌म्याड्‌बा मुला, ओच्छे डाइ याड्‌बा इनाम भिबान एनीगदे हिन्ना। थेतबासेलमा डाला ह्योगदे, एनीगदे सदन चुहड्‌ लसीन प्रभुदेन छ्याम गिक तसी चिउ।

आँट पिन्बा ताम

2 इयोदियादेन सुन्तुखे, एनीगदे प्रभुदेन गिक तबासे लमा हाड हाड न्हडरी ढिकसी चिउ भिबा डाला बिन्ती मुला। 3 डाला विश्वास लखम्बा ह्यो, एदा डाइ चु ताम पाड्‌ला, चु म्रिडम्हेमेगदेदा एसे ह्यो लसी पिन्गो। तिग्दा भिसम थेनीगदेसे डादेन छ्याम थार्बा

* 3:17 १ कोर ४:१६; ११:१

पिन्बा समाचार थेःना लबा गे लबा मुला। डादेन छ्याम जे आहिन, क्लेमेस भिबा म्हिदेन डाला अर्गु ह्योगदेदेन छ्यामएनोन थेनीगदेसे ढिक्सी गे लबा मुला। परमेश्वरसे थेनीगदे जम्मालान मिन जुकजुकधोनाला जुनी पिन्बारी ह्याडला किताबरी भिसी थान्बा मुला।

4 ओच्छे प्रभुदेन गिक तबासे लमा एनीगदे ताङ्गो, डाइ दोःसीनोन पाङ्गला एनीगदे सदन ताङ्गो। 5 एनीगदेला सोजो बानीबेहोर जम्मान म्हिगदेसे था याङ्गौ। तिग्दा भिसम प्रभु फेपूखसी जिन्बा मुला। 6 एनीगदेसे तिगै तामरी सुर्दा थालउ। तर जम्मान तामला लागिरी प्रार्थना लबान धन्यवाद पिन्सी परमेश्वरदेन छ्याम बिन्ती लउ। 7 म्हिसे था आयाङ्बा परमेश्वरसे पिन्बा शान्तिसे एनीगदे जम्मालान म्हन्बा तामदेन सेमदा ख्रीष्ट येशूदेन छ्याम गिक सहोसी जोगब लसी थान्ना।

8 दाहेन्से ज्योज्यो आले नाना आडागदे, एनीगदेसे जुन ताम सत्य मुला, जुन ताम मान याङ्बा खाल्ला मुला, जुन ताम ठीक मुला, जुन ताम चोखो मुला, जुन ताम ताङ्बा खाल्ला मुला, जुन ताम ढिक्बा मुला ओच्छे जुन ताम जम्मादान सेम निबा खाल्ला मुला थेनोन तामरी सेम लउ। 9 एनीगदेसे जुन ताम डाग्याम लोपूजी, जुन ताम डाग्याम याङ्जी, जुन ताम थेःजी ओच्छे जुन ताम म्राङ्जी, थेनोन ताम अन्छार भ्रउ। चुहङ् लजी भिसम शान्ति पिन्बा परमेश्वर एनीगदेदेन छ्याम तला।

भेटीला लागिरी धन्यवाद

10 एनीगदेसे ल्हानान धिन लिच्छा डादा दोःसी ढन्बासे लमा डा प्रभुदेन छ्याम ल्हानान ताङ्बा मुला। डाला लागिरी एनीगदेसे ल्हानान सुर्दा लबा मुबा। तर एनीगदेसे डादा पिन्बारी मौका आयाङ्नी। 11 डादा खाँचो तजी भिसी पाङ्बा आहिन। तिग्दा भिसम जस्तोन धुइरी सन्तोक लसी चितोःमुला भिसी डादा था

मुला। 12 ओच्छे खाँचो तसै आतसै खाहङ् लसी भ्रतोःला भिसी डादा था मुला। थेहङ् लसीन चम्याङ्सै चआम्याङ्सै, ल्हाना मुसै च्याङ्ना मुसै जस्तोन धुइरी सन्तोक लसी चितोःमुला भिसी डादा था मुला। 13 ख्रीष्टसे पिन्बा शक्तिग्यामनोन डाइ चु जम्मान ताम लबारी खम्ला।

14 तसैनोन एनीगदेसे डादा दुखरी ह्यो लसी ज्यबा लजी। 15 डाच्छा डाइ एनीगदेदा थार्बा पिन्बा समाचार थेःना लसी माकेडोनिया भिबा ग्लाग्याम निबारी छ्याइमाएनोन चुहङ् लसी किन्बा पिन्बा गे लबा चा एनीगदे फिलिप्पीला म्हिगदे बाहेक अर्गु खजिबै मण्डली आरेमुबा। थे ताम एनीगदेदा थानोन मुला। 16 थेहङ् लसीन डा थेसलोनिके भिबा ग्लारी मुबा धुइरीनोन एनीगदेसे ल्हानान रेम चुहङ् लसीन डादा ह्यो लमुबा। 17 डाइ चु ताम पाङ्सी एनीगदेग्याम भेटी किन्बारी म्हाइबा आहिन। तर एनीगदेसे डादा लबा ह्योग्याम परमेश्वरसे मोलम पिन्गै भिबा डाला आश मुला।

18 एनीगदेसे इपाफ्रोडिटसदा पुइखबा भेटीग्याम डादा तोःतेधोना छ्योबा मुला। थे भेटी चा परमेश्वरदा सेम निबा बासना खबा बलि दोबा मुला। थे म्राङ्सी परमेश्वर ल्हानान ताङ्बा मुला। 19 ख्रीष्ट येशूग्याम डाला परमेश्वरसे हाङ्ला शक्तिग्याम ताङ्सी ताङ्सी एनीगदेदा तोःबा जम्मान सहेगदे थेला सम्पत्तिग्याम पिन्ना। 20 यहाङ्ला परमेश्वर आबाला सदन मानदेन जयजयकार तगै। आमेन।

चिठीला थुमरी भिबा ताम

21 ख्रीष्ट येशूदेन छ्याम गिक तसी चिबा परमेश्वरला जम्मान म्हिगदेदा फ्याफुल्ला। चुरी डादेन छ्याम मुबा ज्योज्यो आले नाना आडागदेसेनोन एनीगदेदा फ्याफुल्बा मुला। 22 परमेश्वरला म्हिगदेसे ओच्छे खास लसी रोमी ग्याल्बो कैसरला गे लबा म्हिगदेसेनोन एनीगदेदा फ्याफुल्ला भिसी पाङ्बा मुला।

फिलिप्पी 4:23

14

फिलिप्पी 4:23

²³ प्रभु येशू ख्रीष्टला दयामाया एनीगदेदेन छयाम तगै।

परमेश्वरला बचन छार कबुल
New Testament in Tamang, Eastern

Copyright © 2011 Eastern Tamang Language Team

Language: Eastern Tamang (Tamang, Eastern)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2011, Wycliffe Bible Translators, Inc. and Eastern Tamang Language Team.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937221221

The New Testament

in Tamang, Eastern

© 2011, Wycliffe Bible Translators, Inc. and Eastern Tamang Language Team.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 14 Jun 2018 from source files dated 7 Jun 2018

75fec6d5-7473-5018-a7c0-dd9740a83748